

Pita 1

leta pakanama ya girumina

Pita na waikaiwama

1 ¹ Taugu Pita, Yesu Keriso na apasolma. Uma letanama ya girugiurmina taumi tauwai sumağa aitağa koyai daberarimi be Pontas, Galesia, Kapadosia, Eisia be Bitinia provinsdiğa ko miamiana ġaromie. Taumi mara banegimima be nam uma dobunama ġarona aubainama vağai dobu matabuna ko nağonağona. ² Tamadama Mamaitua bonideğö ya vinemina da taumi Yesu Keriso ko voteyeteyena. Tauna kosinine ya koğemi be Arua Babau ya voiemi da taumi banaga babaumima koya tubuğana.

Bada na raukiviverema be na subama ġaromie ta maura be ta kena nonoğana.

Noğota yawayawasaninama

³⁻⁴ Dà Badama Yesu Keriso Tamanama Mamaitua tà kaisuğusuğuna, baninama na raunuatoima ya moraba kauana aubainama, tauna ya voida da tè tubuğa vitara be yawasana vaunama ya utedana. Yodi noğota yawayawasaninama nopode e kenakenana da tokare marae tà nağona, inam dabudine dà buderima Mamaitua e raberabena. Be inam buderinama marae e kenakenana aubainama, tokare nam e bova bo e gewagewa, ibewa da e kena nonoğana. Inam kaudima matabudi Mamaitua ya utedana, baninama Yesu Keriso gurie be ya midisuğu munağana. ⁵ Taumi ami waisumağama aubainama, Mamaitua na rewapanama ya midi ġağarimi be e raberabemina, naumeki da yawasana e veraverauna tokare rağan damone e mağatarana. ⁶ Inam kaudima aubaidima taumi ko mosari guratana, avedi da yodi rağan ġaubonama nopone piripiri tabu be tabu ġaromie ta tubutubuğana, be yağoro da taumi koi nuaverena.

⁷ Be piripiri tabu be tabu ġaromie ta tubutubuğana inam baninama Mamaitua sibo ya kitana değoda ami waisumağama inam riukaua bo

ibewa. Inam piripiridima maika gold banaga kai matane ta gabugabu vuneḡidina maika. Be gold tauna yaba samosamoinama, be na verema nam ami waisumaḡama maika. Be deḡoda ami waisumaḡama inam riukaua, naumeki da tokare nam e samoa. Be taumi tokare ami waisumaḡama votedima ko banavidina, Yesu Keriso e maḡatarana raḡanine. Tauna tokare e kawa saḡemi, be boruma da vivira e utemina.

⁸⁻⁹Aruimima Mamaitua ewai yawasanidina, inam vutuna parata ya boruborue yodi ami waisumaḡe koya tavana. Avedi da taumi Yesu Keriso nam ko kitana, be yaḡoro da kowai nuapaḡoena; nam ko kitana be yaḡoro kowai sumaḡena, be ma mosarimi kowai nuaverena.

¹⁰Boni peroperoveta a riuna da taumi tokare ḡaromie inam yawasaninama e maḡatarana. ¹¹Boni Keriso Aruinama taudi nopodie ya giugiuna da Tauwai yawasana tokare ei nuatoitoina be murine tauna na yawasana boruboruminama e maḡatarana. Be peroperoveta a wanawana rereḡena da sibo a katai kauena airaḡan uma kaudima ta tubuḡa, be nema ta tubuḡa bako.

¹²Mamaitua inam giudima peroperoveta yai kataidina, nam taudime sagu munaḡedima aubaina, ibewa da taumi aubaimima inam kaudima a giuguedina. Inam giudima vutudi taurauguguya ḡaromie a verau be Arua Babau na rewapanae vari verenama a rauguguyena. Inam Aruinama vutuna Mamaitua marae ya riupore yovoḡena ḡarodie. Be anea mate inam kaudima ta goeḡoe kauena da sibo a katai kauena.

Taumi sibo banaga babaumima koya miamiana

¹³Vutuna aubainama ami noḡotama ko vokaukaua wainonoḡedina noya aubainama. Be mate ko rabe kauemina, be tokare Yesu Keriso e maḡatarana raḡanine, Mamaitua na raukiviveree tokare yaba veredima e utemina. Ami noḡotama vutuna ḡarone ko boru be koi rabana.

¹⁴Taumi ko miana Mamaitua na sedama vovoteyeteyedima maika, be nam ami ḡoanama kaudima gewegewedima koi muriwatanedi. Inam yawasanidima taumi boni bua na miane koya miamiana raḡanine nama koya voivoiana. ¹⁵Tauna tauvinemima tauna banaga babaunama, vutuna aubainama ami yawasanae yaba matabuna ko voiedina, tauna taunaḡa na ḡoanama ruvane ko voiedina. ¹⁶Baninama Mamaitua umanama ya riuna, “Taugu banaga babauguma, vutuna aubainama taumi mate sibo banaga babaumima koya miamiana.”

¹⁷Be ko noḡoti da taumi mara banegimima be Tamemima ḡarone ko moiragi be kowai kawa mamaina, tauna tokare banaga tenatenaḡaḡa abaḡa veredi bo gewegewedima a voivoiedina, ruvedie nama e kaiviredina. Avedi da banaga dosidi bo kamai banabanaga, matabudi tokare e kaiviredina. Vutuna aubainama taumi vaḡavaḡai uma dobune ko naḡonaḡona Mamaitua ko vivira kauena. ¹⁸⁻¹⁹Baninama tauna nam

yaba samosamoidima maika goldie bo manee i gimara dobiġemina, ibewa da Keriso kosinine ya gimara dobiġemina. Keriso tauna vutuna Mamaitua na tipama vere vavasaġinama maika sipu natunama. Be taumi ami yawasanama yateyatemima ġarodie be a yovoyovona, inam yawasanana kavekavedima. ²⁰Muriġa da dobu ai tubuġina, be noġone Yesu vinevinenama nama ya miamiana, be yodi raġan damodamodie tauna taumi kami taiye ya kawa maġatarina.

²¹Yodi taune taumi Mamaitua kowai sumaġena, be ami noġotama Mamaitua ġarone koya boru be kowai rabana. Baninama tauna vutuna Yesu gurie be ya kawa midisuġu munage be na borumama ya utena. ²²Be taumi riukaua koyawai muriwatanena raġanine, taumi nopomima koya kawa veredina Mamaitua matane. Vutuna aubainama yodi taumi ami banabanagama nuenuemima tabutabune kowai nuapaġoedina. Be inam yawasaninama naumeki da ko kaiguratena raġan matabuna.

²³Mamaitua na pesima nopomie ya kumana aubainama koya tubuġa vitarana, be yodi yawasanana vaunama nopomie e kenakenana. Be Mamaitua na pesima tokare nam ei kave pesi ġesaudima maika, ibewa. Be Mamaitua na pesima nopomie ya kumakumana, inam tauna riunama yawayawasaninama be kenakena nonoġinama. Vutuna aubainama taumi mate tokare yawasanama vaunama nopone ko mia nonoġana.

²⁴“Be banaga matabudi taudi maika mui, be borumidima inam maika berana.

Baninama mui tokare ta poki makaina be berana tokare boedima nam nama ta kena dauna da tokare ta kuruva poraġana,

²⁵be Bada riunama tokare e kena nonoġana.”

Inam vutuna tauma kè rarau guguyena ġaromie.

2 ¹Vutuna aubainama ġaromie yawasanana gewegewedima maika: Waikarakarakutu, kaiyovu, unura be waitupadeġa ko kaiporaporaġana. Inam nama yabedima matedima tabu be tabu ġaromie ta kenakenana ko gosedi. ²⁻³Taumi kaite koya kita da Bada tauna banaga verenama, vutuna aubainama taumi ami kanima sibo Bada riunama koya ġoēgoē guratena, maika gomana wawainama susu e kanikani nonoġena nama. Inam kedane taumi ko katai kauena da Mamaitua riukaua yai yawasanimina.

Yesu tauna yeku yawayawasaninama

⁴Ko verau Yesu Keriso ġarone. Tauna vutuna yeku yawayawasaninama banaga a tuaġaiena, be Mamaitua ya vine be noġotinama tauna ġarone ya moraba kauana.

⁵Be taumi mate yeku yawayawasanimima be Mamaitua ya vinemina da tauna Aruinama kana vadama taumi e rarau vadaemina. Be tauna ya voiemi da taumi Mamaitua na pirisima babaumima be Arua Babaue

taumime koi uta munaḡemina maika puyo. Inam puyonama vutuna Yesu Kerisoe Mamaitua ewai aninena. ⁶Maika girugiruminama porane ya riuriuna nama:

“Taugu yeku Saionma yà boruboruna ko kitana, inam yekunama vutuna vada yasinama.

Be yekunama noḡotinama ḡarogue ya moraba kauana.

Be aitau uma yekunama ewai sumaḡena, tauna tokare nam tunimayaḡe e mia.”

⁷Taumi tauwai sumaḡa ḡaromie inam yekunama noḡotinama ya moraba kauana. Be aitaḡa nam timawai sumaḡena, taudi adi giuma umanama girugiruminama porane ya riuna,

“Yeku vada taukerinama a tuaḡaiena, be yekunama vutuna Mamaitua ya voie da na vadama yasinama ya tubuḡana”

⁸Be mate ya riuna,

“Inam yekunama vutuna banaga e voiedi da ta saḡai vitare be ta bekubekuna.”

Taudi Mamaitua na giuma ta riuriu tuatuaḡaiena, vutuna aubainama taudi tokare ta bekuna maika Mamaitua ya vinevinedina nama.

⁹Be Mamaitua taumi ya vinemina da taumi tauna na banagama babaumima, taumi guyaguyau be na pirisima, vutuna aubainama taumi Mamaitua ḡaroḡaronama. Yodi taumi isanama ko kawakawa saḡesaḡena, baninama taumi noḡone tadiwanawana nopone, be tauna yai doka dobiḡemina tauna na yanama vere vavasaḡinama nopone.

¹⁰Noḡone taumi nam Mamaitua na damma nopone, be yodi taumi na damma nopone ko miamiana.

Noḡone Mamaitua na raunuatoima nam ko kataiena, be yodi taumi na raunuatoima koya kataie be koya paḡona.

Banaga matedie nema sibo tè mia bako?

¹¹Yau banaga vavasaḡama, taumi mara banegimima be nam uma dobunama ḡarona aubainama, vaḡai dobu matabuna ko naḡonaḡona. Taumi vaḡavaḡai uma dobune ko babababarana, vutuna aubainama taugu yà riuriu vavasaḡemina da taumi ḡoana gewegewedima ko gosedina, baninama inam ḡoendima vutudi aruimima tai ḡavie be tawai gwaḡana. ¹²Banaga nam waisumeḡidima matedie taumi ami yawasanama didimanidie ko miana. Be voia verediḡa taudi matedie ko voiedi be ta kitedina, avedi da taudi tawai wavu yababemina da taumi kabe gewagewa ko voivoie. Be tokare Bada etara aubainama e veraverau munaḡana raḡanine, taudi tokare Mamaitua isanama ta kawa saḡena ami voiamia veredima aubainama.

¹³Banaga adi waibadama tabu be tabu dibudie taumi ko miana Bada isanama aubainama. Dobu guyaguyaudima^a taudi adi waibadama dibune gabeman tawai badana, vutuna aubainama ko voteyeteyedina. ¹⁴Be guyaunama na gabegabemanimata mate adi waibadama dibune ko miana, baninama taudi guyau ya riuporedina da gewagewa tauvoiedima naumeki da sibo a kovogidina, be aitauga da vere tauvoiedima isedima ta kawa saḡedina.

¹⁵Be inam Mamaitua na ḡoanama da taumi sibo vere koya voivoiedina, be vere inam banegidima nam aba ti kataie be ta giugiu yabayababana, ko rawanatuḡudina. ¹⁶Bada Yesu gewagewae be ya kuvesimina. Be nam aita u kwa riuna, “Yodi nam aiyaba ima panipaniguna, aubainama yau ḡoane nama ya voia yabayababana”. Inam avedi! Taumi sibo koya miana Mamaitua na taunoyama maika. ¹⁷Banaga matabudi ko viviredi, Mamaitua ko naire be na damma banegidima koi nuapaḡoedina. Be mate dobu guyaunama ko vivirena.

Piripiri sibo tē dami poredina Keriso maika

¹⁸Taunoya, ami babadama ko viviredi be ko voteyeteyedina. Nam babada vovoyaḡotidi bo veredima taudiḡa ko voteyeteyedi, ibewa da babada kivi korokorodima mate ko voteyeteyedina. ¹⁹Deḡoda banaga nam aba i voia waigewana, be a raukivi gewagewa yababena, be tauna Mamaitua ewai sumaḡe be ewai nuapaḡoena aubainama, naumeki da inam piripirinama e dami porenana Mamaitua anitai nuaverenama aubainama. Inam kauinama Mamaitua matane ya vere kauana. ²⁰Be deḡoda taumi gewagewa koya voie be a raukivi gewegewemi be koya dami porenana, inam naumeki da ami voia waigewama kovoginama koya paḡona. Be deḡoda vere koya voivoie be banaga a raukivigewagewa yababemi, be taumi inam raukivigewagewanama koya dami porenana, inam kaua dosinama Mamaitua matane koya voiena.

²¹Tauna ya vinemina inam vutuna aubainama. Baninama taumi kami taiye Keriso mate ya mariyawa be piripiri matabudi ya dami poredina. Naumeki da tauna na wainuatoitoie keda yai kataimina da taumi nama sibo murinaḡa koya naḡona. ²²“Tauna nam aba gewagewanama tenaḡa maika i voia rubuna. Be nam waitupa kaiyovu mudune i dobi rubuna.” ²³Banaga a kunukunurena raḡanine, tauna nam i kunura ḡaredina. Be a raraukivi gewegewena raḡanine, tauna nam i riuwai nainairidina. Ibewa da na nuaboyama be na yawasanama matabuna Mamaitua nimane ya biridina, baninama tauna ya kataiena da Mamaitua tokare inam kaudima e kawa didimanidina. ²⁴Tauna tubuḡa ḡomine dā gewagewama

^a 2.13 Uma dobudine dobu guyaguyaudima inam nam Seitan. Taudi maika ‘king’ bo ‘queen’.

ya kiroḡa nawedina korosie. Inam kedane tauda gewagewae be ya kuvesidana, da yodi Mamaitua na ḡoane yawasana didimanidie tà miana, be gewagewa na rewapanama nam ḡarode ima kenakenana. Keriso na keroe taumi koya yawasanana. ²⁵Baninama boni taumi sipu kwakokwakodima maika ami ḡoane koya naḡonaḡo yabayababana. Be yodi taumi sipu taurabenama ḡarone koya verau munaḡana. Tauna vutuna ei dokemi be e rabe kauemina.

Banaga wainaḡidima adi giuma

3 ¹⁻²Be kauinama teneḡinama nama, taumi waiwaivi ami tautauḡomama ko viviredi be adi waibadama dibune ko miana. Inam kedane ami tautauḡomama ḡesaudima aitaḡa vari verenama nam timawai sumaḡena, taudi tokare ami yawasanama veredima ta kitedi be adi noḡotama ta vitaredina.

³Be anikawa veremima aubainama nam tubuḡe koi siemi, maika waidebaviri bo komakoma kibokiboridima bo gara waimatakanikanidima. ⁴Ibewa da yawasana veredima nopomie maika voyaḡota be miagenuana, vutudi ami waisiama. Inam waisiedima veredima tokare nam ta samoa. Inam yawasanidima vutudi Mamaitua matane a moraba kauana. ⁵Boni waiwaivi Mamaitua tauwai sumaḡenama taudi uma kauidie ai siedina. Taudi adi tautauḡomama a viviredi be adi waibadama dibune a miamiana, ⁶maika Sera, tauna na tauḡomama Eibraham ya vovo teyete ye be yawai isana bada. Be taumi deḡoda ami tautauḡomama nam ko nairedi be yawasana didimanidima ko voiedina, taumi naumeki da Sera na sedama.

⁷Be kauinama teneḡinama nama taumi tautauḡoma ami visavisarama mate koi nuatenaḡa, be ko rabe kauedina, baninama taudi nam ti rewapanana. Taudi mate yawasana kenakena nonoḡinama tokare ta paḡona maika taumi. Vutuna aubainama ko viviredina. Be deḡoda ibewa, taumi ami moiragima tokare Mamaitua e vaia yababena.

Piripiri ko dami porena

⁸Vutuna aubainama taumi matabumi ko mia genuana be koi nuapaḡo vivira, be ko raunuatoi, ko raukivi vere be ko ḡaubo munaḡana. ⁹Be aitaḡo gewagewa ḡaromie e voiena, nam gewagewae koi maesi, avedi. Be aitaḡo da e kunuremina, nam ko kunura ḡare, avedi, baninama taumi Mamaitua ya vinemina da vere taudi ḡarodie ko voiedina, inam kedane tokare vere koi buderiena.

¹⁰“Baninama deḡoda aitaḡo yodi yawasana verene mieninama e ḡoena, bo yawasana veredima kitedima e ḡoena, naumeki da tauna menanama e rabe kauena, be giu gewegewedima nam mudune e giuedi.

11 Tauna gewagewa e gose poredi be vere e voidina. Be tauna suba e wane da e wane guratena.

12 Aitauḡa vere tauvoidima, Mamaitua taudi e raberabe kauedina, be adi moiragima tokare nam e vaia yababedi.

Be banaga aitauḡa gewagewa tauvoidima, Bada taudi e miamia tautauriedina.”

13 Deḡoda taumi vere voienama ko ḡoe guratena, tokare aitau e raukivi gewegewemi? 14 Be deḡoda vere koya voivoie be banaga a raukivi gewagewa yababemina, naumeki da nuemima e verena, inam kaua dosinama Mamaitua matane, be tauna tokare yaba veredima e utemina. Inam banegidima gewegewedima ḡarodie nam nuemima e rovo bo ko nairedi. 15 Be nuemima nopone Keriso ko paḡo da tauna vutuna ami Badama be ko vivirena. Be raḡan matabuna ko vokaukaua be ko miamiana, be raḡanine aitau ami waisumaḡama ei taravirena, taumi waigapa ko paribeena. Be uma kaudima vivire be voyaḡote ko voidina. 16 Be taumi ami yawasanae raḡan matabuna Keriso ḡarone didimanae, be mate ami noḡotama didimanidie ko miana. Dabudine banaga ami yawasanama didimanidima ta kitedi be waitupadeḡa banegidima tokare debedima ta subana. 17 Deḡoda gewagewa tà voivoiedi be pipiripi tà banavina inam naumeki, dà kovoḡama tè paḡona. Be ya verena deḡoda Mamaitua na ḡoane vere tà voivoiedi be pipiripi tà banavina, inam naumeki da tà dami poredina.

18 Keriso dà gewagewama aubainama pipiripi ya banavi be ya guri tenaḡana, be tokare nam e guri munaḡa. Inam kauine tauna yai doka nawedana Mamaitua ḡarone. Keriso tauna vutuna didimana baneginama, tauda gewagewa banegidama aubaidama tubuḡe ya gurina, be Arua na rewapanae Mamaitua tauna ya kawa midisuḡu munaḡena.

19 Be arue tauna ya naḡona arua dibure miemienidima ḡarodie be ya rauguguyana. 20 Taudi vutudi boni Noa waga ya voivoiena raḡanine, taudi a mia be Mamaitua a rawarawa ḡaiḡaiena. Be Mamaitua yawai raba nuetauna da taudi sibo nuedima a vitaredina, be taudi yaḡoro da a rawarawa ḡaiḡaiena. Vutuna aubainama Mamaitua banaga raubisaḡa sievinama 8, taudiḡa yai yawasanidi be nam upae ti monu be ti gurina. 21 Be uma upanama inam babataito ewai matairena. Vutuna yodi ewai yawasanimina. Babataito inam nam tunidama miranama koḡaporenama aubaina, ibewa da babataito baninama inam umanama: Mamaitua tàwai baḡana da nopode dà noḡotama e kawa didimanidi be nuadama e subana. Be inam kauinama tèwai baḡena, Mamaitua tokare e utedana, baninama Yesu Keriso gurie be ya midisuḡu munaḡena aubainama.

22 Tauna ya naḡo marae be yodi Mamaitua kasaune e miamiana. Vutuna aubainama yodi anea be arua wairewapanidima, be rewapana ḡesaudima matabudi Keriso na rewapanama be na waibadama dibune ta miamiana.

Ami yawasanama ko vitaredi be Mamaitua na ġoane ko miana

4 ¹Keriso tubuġe yai nuatoitoina aubainama, raġanine tauda piripiri tà banabanavidina, naumeki da sibo tèi nuabagibagi be tè dami poredina dà Badama Yesu maika. Baninama aitalu da tubuġe piripiri e banavidina na waisumaġama kana taiye, inam ewai maġatarana da tauna riukaua gewagewa ya gosedina, ²be na damonama yodi tauna na yawasanae nam uma dobunama yawasanidima tokare ei muriwatana munaġedi. Ibewa da tauna yodi Mamaitua na ġoane e miamiana. ³Banimama taumi dobu na ġoane, naumeki koyai nuavere ġarovana. Inam taudi banaga nam waisumeġidi taudi adi yawasanama, kitedima maika badara yabayababa, tegobua, kaniposa, tegobua soidima be taparoro kaikaiyovudima maika kokoitalu rauduneedima.

⁴Be yodi banaga nam waisumeġidi taudi a base da taumi inam kaudima gewegewedima koya gosedina. Inam vutuna aubainama yodi taudi ġaromie tawai menamenana. ⁵Taudi tokare Mamaitua noġone ta etarana. Tauna kaite e vovo kaukauana da tokare banaga yawayawasanidima, be guriguridima matabudi e etaredina. ⁶Vutuna aubainama banaga guriguridima vari verenama a vaiena da taudi tubuġe kovoġa a paġona, be arue ta yawasanana.

⁷Yaba matabudi kaiteka adi raġanima damone tà tavatavana. Vutuna aubainama nam ko voia yabayababa, avedi, taumi ko mia genuana, koi noġota kaua, yodibe ko moiragina. ⁸Be yaba dosinama inam: Ami banagama ami banagama koi nuapaġo kauedina, baninama wainuapaġo gewagewa toitoi e rupurupudina. ⁹Ami banagama ami vadae ta saġana nam ko momoduedi. ¹⁰Taumi tenatenaġaġa ami puyoma tabu be tabu Mamaitua na raukiviveree ya uteutemina. Inam puyodima ko rabe kauedi be inam puyodie ami banagama ko sagu kauedina. ¹¹Aitalu da taurauguguya, naumeki da Mamaitua riunama sibo ya rauguguyena. Be aitalu da tauwai kaisagu, naumeki da Mamaitua na rewapanae na banagama sibo ya sagudina. Inam kaudie Yesu Kerisoe Mamaitua tà kawakawa saġena dà voiamma veredima aubaidima. Tauna vutuna ġarone, neneġara be rewapana ta kenakena nonoġana. Inam riukaua.

Keriso kana taiye deġoda piripiri tà banavidina

¹²Yau banaga vavasaġama, taugu è kataiena da taumi yodi raurubu be piripiri ġaromie ta kenakenana. Be inam piripiridie Mamaitua ami waisumaġama e rarau rubudina. Be uma kaudima nam ko nuababaġedi be ko riuna, “Uma yodi aba ġarogue e tubutubuġa.” ¹³Ibewa da koi nuaverena, baninama taumi Keriso na wainuatoitoima kowai nuatoitoi saguna, be raġanine Keriso ma neneġarina e verau munaġana, taumi tokare koi nuavere be ko mosarina.

¹⁴Be deḡoda Keriso waimuriwatanenama aubainama banaga ta kunuremina, taumi naumeki da koi nuaverena, baninama Mamaitua Aruinama boruboruminama taumi ḡaromie. ¹⁵Deḡoda taumi gewagewa ko voivoiedina maika rauvunuḡa bo danene bo banaga adi giu bo adi voiam kowai badabada yababedi be damone piripiri ko banavidina, inam naumeki da ami kovoḡama koya paḡona. ¹⁶Be deḡoda Keriso kana taiye piripiri ko banavidina, nam ko tunimayaḡa. Taumi koi nuavere be Yesu isane Mamaitua ko kaisuḡusuḡuna. ¹⁷Etara raḡaninama kaiteka e tavatavana da Mamaitua na damma ḡarodie etara ei karena. Be deḡoda Mamaitua tauda tauwai sumaḡa e etare dokedana, naumeki da banaga aitaḡa Mamaitua na varima verenama nam ti vovo teyetyena, taudi nemanama? Taumi ko noḡonoḡotina taudi tokare ta yawasana, bo? ¹⁸Be “Deḡoda didimana banegidima Mamaitua na yawasanama kedanama banavinama ḡarodie e piripirina, naumeki da gewagewa banegidi bo banaga adi yawasanama barebaredima, taudi tokare nema inam yawasaninama ta banavi bake? Nam teneteneḡina!”

¹⁹Vutuna aubainama taumi aitaḡa Mamaitua na ḡoane kowai nuatoitoina, taumi ami yawasanama Mamaitua nimane ko boru, be voia veredima ko voiedina, baninama Mamaitua tauna tauwai tubuḡa patupatutunama.

Ekalesia babadidima adi raukurama

5 ¹Yodi yau giuma taumi ekalesia babadimima ḡaromie yà boruna. Taugu mate ekalesia kana badama be Keriso na wainuatoitoima èi matematena. Be taugu mate tokare Keriso e maḡatarana raḡanine yau buderima boruboruminama e uteguna. ²Mamaitua Na Sipuma ko rabe kauedi. Nam aitaḡa ima segesegerimina, ibewa da taumi nuemie koi rabaraba kauana, baninama inam vutuna Mamaitua na ḡoanama. Be nam waigogo bo mane ko noḡoti be koi rabaraba. Ibewa da taumi Mamaitua koi nuapaḡoe be aubainama koi taunoyana. ³Nam koi badabada gurata ḡarodie, ibewa da voia veredima ko voiedi be ḡaromie ta kitana. ⁴Be sipu taurabedima adi badama e maḡatarana raḡanine, taumi tokare ami maesama boruboruminama e utemina, inam maesinama tokare nam e samao.

⁵Yarayaraga taumi ko ḡaubo munaḡa be babada adi waibadama dibune ko miana, baninama

“Mamaitua banaga raurau guyaguyaudima e biri dobiḡedina. Be banaga matabumi yà riuriuemina da aitaḡa e ḡauḡaubo munaḡana, Mamaitua tauna tokare e raunuatoiena.”

⁶Vutuna aubainama Mamaitua matane ko ḡaubo munaḡana. Be na ḡoanama nama raḡanine tauna tokare e kawa saḡemina. ⁷Ami

nuaboyama matabudi Mamaitua nimane koi damidina, baninama tauna vutuna taurabemima.

⁸Koi kita kaua be ko rabe munaḡemina! Baninama kami tauma Diaboro e karakaravemina laion maika, e guda yarusimina aubainama. ⁹Be piripiri raḡandie ami waisumaḡe ko midi da bagibaginaḡa, be Diaboro ko riutuḡaiena, baninama ko noḡoti da tauwai sumaḡa dobu ḡesaudie piripiri teneḡidima nama ta banabanauidina.

¹⁰Mamaitua yai aninana da yodi taumi raḡan ḡaubonaḡa ko rautapa wainuatoitoina. Be nam koi nuaboya, baninama Mamaitua tauna raunuatoi baneginama aubainama, tauna Yesu Kerisoe ya vinemina da taumi tokare tauna mate ko mia nonoḡana na kaba miama boruborumine. Tauna tokare e kawa didimanimina, be na raukiviveree tokare rewapana e utemi da taumi ami waisumaḡe ko midi bagibagina, be tokare piripirie nam ko beku. ¹¹Tauna vutuna ḡarone rewapana e kenakena nonoḡana. Inam riukaua.

Pita na giuma damonama

¹²Taugu uma letanama tuponama è girumina ḡaromie, be Sailas turaguma patupatutunama tauna ya saguguna. Taugu è girumina ḡaromie duḡumima aubainama, be yài maḡatarimi da taumi avedi da piripirie kowai nuatoitoina, be riukaua da Mamaitua na raukiviveree ko miamiana. Vutuna aubainama inam raukivivere ne ko midi da bagibaginaḡa.

¹³Tauwai sumaḡa matabudi uma Babilon nopone miemienidima tawai kaiwemina. Taudi mate Mamaitua ya vinedina maika taumi. Be natuguma^b Mak tauna mate ewai kaiwemina. ¹⁴Be wainuapaḡoe koi kaiwa vivirana.

Matabumi aitaḡa Kerisoe miemienima suba ḡaromie e kenana.

^b 5.13 Mak tauna nam Pita natu ḡomina. Ibewa da arue natuna.